



ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Educación e Cultura

Aprobación das bases da 2ª edición do Premio “José Gil” de cinema en galego do ano 2026

Mediante resolución de Presidencia aprobáronse as Bases da 2ª Edición do premio “Jose Gil” de cinema galego do ano 2026

2ª Edición do Premio “José Gil” de cinema en galego do ano 2026

BASES

Primeira.- Obxecto

Tendo en conta a significación especial que, para a produción e a difusión de películas e obras audiovisuais, posúe, dende hai tempo, a provincia da Coruña e coa finalidade de contribuír á memoria de personaxes singulares e representativos neste campo como foi José Gil, a Deputación da Coruña convoca o Premio “José Gil” de cinema galego do ano 2026.

José Gil foi pioneiro no reporteirismo fotográfico, o nacemento do cine ficcional e documental en Galicia, as primeiras produtoras e laboratorios cinematográficos, o cinema industrial e turístico, a lusofonía audiovisual, o cine educativo e científico, o cinema móbil, os noticiarios, a publicidade, o cinema da emigración, o arquivo fílmico e tantas outras achegas incuestionábeis do cineasta a prol da modernización de Galicia entre 1910 e 1935, representando sen dúbida o máis salientable pioneiro do cinema galego da nosa historia.

Consta de tres modalidades diferenciadas:

- A) Modalidade de guión de longametraxes de ficción en lingua galega**
- B) Modalidade de guión de longametraxes documental en lingua galega**
- C) Modalidade de traxectoria ou iniciativa de especial relevancia no campo do cinema en lingua galega**

O xurado poderá modificar, motivadamente, a adscrición das candidaturas presentadas a cada unha das modalidades.

Segunda.- Solicitantes e candidaturas

- A) Modalidade de guión de longametraxes de ficción en lingua galega**
- B) Modalidade de guión de longametraxes documental en lingua galega**

Nas modalidades A e B poderán participar persoas maiores de idade, escritoras ou guionistas con proxectos de obras inéditas, non subvencionadas, premiadas nin seleccionadas en ningún outro certame ou laboratorio, nin publicadas nin difundidas, total ou parcialmente, por calquera medio.

A orixinalidade da obra e a súa autoría xustificarase mediante unha declaración responsable na que se manifeste ser a persoa autora e titular de todos os dereitos.

En consecuencia, a Deputación Provincial da Coruña non se fará responsable das posibles denuncias por plaxio ou eventualidade similar que poidan xurdir, recaendo na persoa participante afectada as accións legais que procedan e asumirá, se é o caso, as indemnizacións que poidan corresponder polos prexuízos ocasionados a particulares ou á organización.

As persoas participantes terán a obriga de comunicar á Deputación a concesión de calquera premio que obteña a obra presentada, no momento en que esta situación se produza, o que dará lugar á súa exclusión do premio.

Cada persoa poderá concorrer ao certame cun máximo dunha obra e cada obra presentada poderá ser escrita por un máximo de dúas persoas autoras

C) Modalidade de traxectoria ou iniciativa de especial relevancia no campo do cinema en lingua galega

Na modalidade C poderán presentar unha proposta de candidatura argumentada todas as persoas físicas, maiores de idade, ou xurídicas interesadas na promoción do audiovisual galego, excepto as persoas membros do xurado.

Cada propoñente só poderá presentar unha candidatura e non se admitirán autocandidaturas.

As persoas propostas deberán ser persoas físicas maiores de idade ou persoas xurídicas que contén cunha traxectoria comprometida coa promoción e posta en valor do cinema en V.O. galega.

Terceira.- Dotación

Establécense tres premios, dotados con **6.500€**, para cada unha das modalidades.

Os premios das modalidades A e B están suxeitos á Lei de subvencións e á obriga de publicación na BDNS, mentres que o premio correspondente á modalidade C) non está suxeito á devandita lei nin á obriga de publicación na BDNS.

O pago dos citados premios realizarase previa retención do 15%, do imposto sobre a renda das persoas físicas (IRPF) ou 19% do imposto de sociedades (IS), no seu caso.

Os premios poderán quedar desertos ou ser concedidos con carácter ex aequo; neste caso, os seus importes reparti-ranse proporcionalmente entre as persoas que resulten premiadas.

Os premios non poderán concederse a título póstumo, sen prexuízo dos dereitos de sucesión que poidan exercerse se as persoas premiadas falecesen despois da decisión do xurado.

Cuarta.- Prazo

O prazo de presentación de solicitudes iniciárase o día 10 de febreiro de 2026, e finalizará o día 10 de abril de 2026, logo da publicación do extracto da convocatoria deste premio no BOP da Coruña, a través da Base de Datos Nacional de Subvencións.

Na modalidade C, a cal tramítase de xeito telemático, a través da plataforma de tramitación electrónica da Deputación (SUBTEL), o prazo de solicitude finalizará ás 14:00 horas dese día.

Quinta.- Envío da obra e documentación

A) Modalidade de guión de longametraxes de ficción en lingua galega

B) Modalidade de guión de longametraxes documental en lingua galega

En ambas modalidades para garantir o anonimato das solicitudes, a presentación realizarase baixo o sistema de **PLICA** coa presentación dun sobre pechado, a portes pagados, que indique no exterior o título do Premio “José Gil” de cinema galego, ao seguinte enderezo:

Deputación provincial da Coruña

Avenida Porto da Coruña 2

15003 A Coruña

Dentro deste sobre principal incluíranse dous sobres (sobre A para a obra e sobre B para a documentación). Ambos sobres indicarán o seguinte no exterior:

- Premio “José Gil” de cinema galego
- Modalidade á que se presenta
- Título da obra
- Un lema ou pseudónimo

Sobre A – Obra

- Incorporará o proxecto proposto en formato PDF en galego, cunha fonte Courier New, tamaño 12 e interlineado sinxelo, que deberá conter a seguinte documentación
 - Unha memoria explicativa do proxecto de guión cun máximo de 10 páxinas rematadas
 - Unha sinopse detallada do contido da obra completa, cunha extensión máxima de 5 páxinas
 - O argumento desenvolvido ou tratamento do proxecto de longametraxe de ficción ou documental para ser filmada en versión orixinal en galego (cun máximo de 20 páxinas)
 - Unha secuencia dialogada

Requisitos:

- A obra deberá estar escrita en lingua galega
- O tema, xénero e a extensión das obras será libre
- Cada obra presentada poderá ser escrita por un máximo de dúas persoas autoras
- Non pode incluír ningún dato que permita averiguar a identidade da persoa autora

- As persoas premiadas terán un prazo de 6 meses, desde a data de concesión do premio, para entregar un exemplar do guión rematado e formateado profesionalmente

Sobre B – Documentación

Incorporará os seguintes documentos:

- Copia do documento de identidade
- Datos de contacto: enderezo, teléfono de contacto, correo electrónico
- Breve currículo
- Documento co seguinte contido:
 - Declaración responsable de que a persoa autora é titular de todos os dereitos e que a obra é inédita e que non foi premiada, até a data de presentación, en ningún outro certame ou premio
 - Cesión temporal dos dereitos de edición da obra (**título da obra**) á Deputación durante un prazo de trinta e seis meses, que se contarán dende a data de entrega do guión rematado e formateado profesionalmente
- No caso de autoría conxunta, ademais da documentación anterior, deberá incluírse un documento explícito coa participación de cadaquén e a porcentaxe do premio pactada entre as persoas autoras e asinada por elas.

C) Modalidade de traxectoria ou iniciativa de especial relevancia no campo do cinema en lingua galega

Nesta modalidade, a convocatoria tramitarase de xeito telemático, a través da plataforma de tramitación electrónica da Deputación (SUBTEL).

Dado que a tramitación será telemática:

- Quen presente a candidatura deberá dispoñer dun único enderezo electrónico de contacto durante a tramitación do expediente, ao que se dirixirán as comunicacións; excepcionalmente, e de xeito xustificado, poderá modificar este enderezo inicial, sempre e cando se lle notifique o dito cambio á Deputación.
- Quen presente a candidatura deberá dispoñer de certificado dixital.
- A solicitude e toda a documentación estará asinada pola persoa que presenta a solicitude.
- A presentación telemática producirá plenos efectos xurídicos, sempre que a solicitude sexa presentada dentro do prazo establecido e na plataforma citada. Non se terán por presentadas as solicitudes que se acheguen noutros rexistros.
- Serán rexeitadas automaticamente as solicitudes que conteñan documentos electrónicos que incorporen código malicioso ou dispositivo susceptible de afectar á integridade ou seguridade do sistema, omitan documentos esixidos, non se cumprimenten os campos requiridos como obrigatorios ou cando conteñan incongruencias ou omisións que impidan o seu tratamento.

A documentación a presentar é a seguinte:

- Acreditación da representación no caso de persoas xurídicas.
- Memoria explicativa da candidatura no que se recollan os datos seguintes da persoa ou entidade proposta:
 - Nome da persoa, colectivo, asociación ou entidade; NIF
 - Nome representante, NIF
 - Enderezo postal
 - Teléfono
 - Enderezo electrónico
 - Enderezo web
 - Méritos que se alegan para a proposta de candidatura, tendo en conta os criterios indicados na base segunda desta convocatoria
- Documentación acreditativa dos méritos da candidatura proposta
- Declaración de conformidade da persoa/entidade proposta coa presentación da candidatura

Sexta.- Xurado

O xurado estará presidido pola Deputada de Cultura, quen actuará con voz e sen voto, e formarán parte del cinco persoas de recoñecido prestixio no ámbito do audiovisual nomeadas por ela.

As funcións de secretaría exerceraas a Secretaría da Corporación ou a persoa funcionaria en quen delegue.

Para o nomeamento do xurado respectarase a presenza equilibrada de mulleres e homes, en cumprimento do disposto no artigo 70 da Lei 7/2023, do 30 de novembro, para a igualdade efectiva de mulleres e homes de Galicia.

As persoas que integren o xurado estarán sometidas ao deber de abstención nos casos sinalados no artigo 23 da Lei 40/2015, de 1 de outubro, de réxime xurídico do sector público.

A composición dos xurados daranse a coñecer, con anterioridade á súa reunión, no taboleiro de anuncios da sede electrónica co fin de que se poidan interpor, se é o caso, os recursos legais pertinentes.

Aplicarase o disposto na Lei 40/2015, do 1 de outubro, de réxime xurídico do sector público (LRXSP), Título preliminar, Capítulo II, Sección 3ª: Órganos colexiados das distintas administracións públicas”, artigos 15 a 18, no que se refire tanto á validez da súa constitución, como á actuación do xurado.

As deliberacións serán secretas e delas serán estendidas as actas correspondentes.

Sétima.- Concesión e pago

Concesión

Nas modalidades A e B, se hai finalista, a plica correspondente á obra poderá ser aberta pola persoa que exerza a secretaría do xurado co fin de que, se a persoa autora o permite, poida darse a coñecer o seu nome.

A proposta de concesión que formule o xurado será obxecto da resolución da Presidencia, que resolverá a súa aprobación, previo informe do Servizo de Acción Social, Cultural e Deportes e do Servizo de Fiscalización.

A resolución de concesión do premio será dada a coñecer a través do Boletín Oficial da Provincia

Non se devolverán as obras presentadas non premiadas e a partir do día seguinte ao da decisión do xurado serán destruídas.

Non poderán obter a condición de persoa beneficiaria aquelas persoas que teñan a residencia fiscal nun país ou territorio cualificado regulamentariamente como paraíso fiscal, de conformidade co disposto no artigo 13.f) da Lei 38/2003, de 17 de novembro, Xeral de Subvencións.

Pago

O pago dos premios nas **modalidades A ou B** realizarase en dous prazos:

- 40%, unha vez concedido o premio
- 60%, despois de que o xurado verifique que a obra responde á descrición do guiión premiado, trala revisión do guiión rematado e formateado profesionalmente.

No caso de que o xurado non informe favorablemente que a obra responde á descrición do proxecto premiado ou no caso de incumprimento do prazo previsto para a entrega da obra completa, a persoa premiada deberá devolver o importe cobrado do 40% do primeiro prazo, máis o intereses legais que correspondan de acordo coa lexislación vixente.

O pago do premio na **modalidade C** realizarase unha vez concedido o premio.

Para o cobro do premio, **nas tres modalidades**, a persoa premiada deberá presentar a seguinte documentación:

Residencia española:

- Certificacións das administracións tributarias correspondentes e da Tesourería da Seguridade Social nas que se acredite que a persoa está ao corrente nas súas obrigas tributarias e coa Seguridade Social.

Poderá omitirse a presentación desta documentación sempre que envíe un documento autorizando expresamente á Deputación provincial da Coruña ás consultas tributarias e non se opoña á consulta de datos da Seguridade Social

- Comunicación de alta de datos bancarios para o rexistro de terceiros, que figura no apartado de impresos oficiais da páxina web da Deputación provincial da Coruña
- Certificación da titularidade de conta, expedida pola entidade bancaria

Outra residencia:

- Copia do pasaporte
- Certificado de residencia fiscal
- Declaración de non ter establecemento permanente en España emitido polo organismo oficial do seu país, no seu caso

- Certificación de titularidade de conta bancaria, na que figure o código SWIFT/BIC

A presentación desta documentación para as tres modalidades, farase preferentemente por medios electrónicos a través do modelo “solicitud xeral” dispoñible na sede electrónica da Deputación da Coruña. Tamén poderá presentala en calquera dos lugares e rexistros establecidos na normativa reguladora do procedemento administrativo común.

A concesión e pago dos premios das modalidades A e B, suxeitos á lei de subvencións, serán publicados na Base de Datos Nacional de Subvencións (BDNS).

Oitava.- Obrigas

A Deputación, que poderá publicar en formato físico a obra premiada nas modalidades A e B, reservarase os dereitos de edición durante un prazo de trinta e seis meses, contados desde a data de entrega do guión rematado e formateado profesionalmente.

Novena.- Protección de datos

Os datos facilitados serán tratados pola Deputación da Coruña coa finalidade de tramitar esta convocatoria.

A participación nesta convocatoria implica aceptar a realización de fotografías e/ou vídeos pola Deputación da Coruña no certame de entrega dos premios ou no desenvolvemento das actividades complementarias.

As ditas imaxes poderán ser publicadas en:

- A páxina web e perfís en redes sociais da Deputación
- Filmacións destinadas á promoción da actividade
- Publicacións para dar a coñecer a actividade

A lexitimación para o tratamento dos datos persoais baséase no cumprimento dunha misión de interese público.

Os datos poderán ser comunicados ás Administracións públicas para o exercicio das súas competencias e serán conservados de acordo co establecido na normativa de arquivo.

As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Así mesmo se considera que o tratamento incumpre co establecido no RXPD pode reclamar perante a AEPD.

Poden consultar máis información relacionada coa protección de datos na nosa Política de Privacidade ou dirixindo un correo a delegadodeprotecciondedatos@dacoruna.gal.

Décima.- Aceptación das bases

A participación nesta convocatoria supón a total aceptación destas bases.

A Coruña, 22 de decembro de 2025

O Presidente

Valentín González Formoso

O Secretario xeral

Miguel Iglesias Martínez

2025/8563